



Telco tandatangani perjanjian pemilikan ekuiti DNB pertengahan bulan ini - Fahmi

Oleh Latifah Arifin - Oktober 6, 2023 @ 3:24pm

latifah@bh.com.my

KUALA LUMPUR: Semua syarikat telekomunikasi (telco) di negara ini dijangka menandatangani perjanjian langganan saham (SSA) mengenai pemilikan ekuiti dalam Digital Nasional Bhd (DNB) pertengahan bulan ini, kata Menteri Komunikasi dan Digital, Fahmi Fadzil.

Beliau berkata, pemeteraian itu mesti dilakukan terlebih dulu sebelum perbincangan lanjut mengenai rangkaian 5G kedua boleh dilakukan, yang berkemungkinan akan diwujudkan pada awal 2024.

"Langkah pertama ialah menandatangani (perjanjian), ini sebagaimana dimaklumkan oleh pasukan petugas (taskforce), jadi jika semua perkara berjalan lancar, ia akan dibuat sebelum pertengahan bulan ini," katanya kepada pemberita selepas Majlis Pelancaran Rangkaian 5G Persendirian Petronas hari ini.

Fahmi dalam satu kenyataan pada bulan lalu berkata, syarikat telco di negara ini dijangka menandatangani perjanjian SSA mengenai pemilikan ekuiti dalam DNB dalam masa terdekat.

Beliau berkata, pelaksanaan rangkaian 5G di seluruh negara dapat dipercepatkan dengan penglibatan telco dalam SSA syarikat yang ditubuhkan kerajaan bagi memacu pembangunan rangkaian 5G negara.

Sementara itu, Fahmi ketika ditanya sama ada kerajaan ada menerima kertas cadangan bagi pelaksanaan rangkaian 5G kedua, jelasnya, perbincangan ketika ini sedang berjalan.

"Saya tidak dapat mendedahkan lebih banyak maklumat mengenai perkara ini kerana perbincangan sangat dinamik dan sedang dilaksanakan pasukan petugas 5G yang dipengerusikan bersama Ketua Setiausaha KKD, Datuk Mohamad Fauzi Md Isa dan Ketua Setiausaha Perbendaharaan Kementerian Kewangan (MOF), Datuk Johan Mahmood @ Johan Mahmood Merican.

Mei lalu, kerajaan mengumumkan bakal memperkenalkan rangkaian kedua 5G melalui satu entiti baharu yang akan diwujudkan pada awal 2024 serta menukar model pelaksanaan 5G ketika ini daripada rangkaian borong tunggal (SWN) kepada dwirangkaian.

Entiti baharu itu akan menjadi rangkaian kedua selepas pelaksanaan 5G ketika ini melalui Digital Nasional Bhd (DNB).